




PAHAYAGAN NG PARTIDO KOMUNISTA NG PILIPINAS
PINAPATNUBAYAN NG
MARXISMO-LENINISMO-MAOISMO

Bayan

Ispisyal nga Isyu

Setyembre 12, 2001

Mga tataw nga hisgutanan mahitungud sa kasamtangang pakigbisog sa mga mamumuong Pilipino alang sa P125 nga dugang nga suholan



Hingpit nga gisuportahan sa Partido Komunista sa Pilipinas ang pakigbisog sa masang mamumuong Pilipino alang sa P125 nga pangkinatibuk-ang dugang nga suholan. Mao kini'y hingpit nga makatarunganon ug hinanaling panginahanglan taliwala sa grabing lamparus ngadto sa masang anak-sa-buhat sa kasamtangang nagsulabing krisis sa ekonomiya.

Gipanghimaraut sa Partido ang mga maniobra sa rehimeng Macapagal-Arroyo aron ibasura ang hangyo alang sa dugang nga suholan. Hugut nga gipasiugda sa rehimen ang neokolonyal nga patakaran sa baratong kusog-pamuo. Nagsunsun ang han-ay sa dagkong kapitalista, reaksyunaryong estado ug mga petiburgis nga grupong repormista sa tinguhang babagan ang pagsulong sa pakigbisog sa mga mamumuo.

www.angbayan.org • editors@angbayan.org

Gimantala sa Komite Sentral sa Partido Komunista sa Pilipinas

Nanagduyug silang nagbungat sa mga propaganda kontra sa mabulukong pagpuno sa suhol sa pagsulay nga unluron ang hugyaw sa mga mamumuo. Larga-tudu ang ilahang makinaryang pangpropaganda aron batukan ang pagpataas sa suholan ug hataga'g rason ang patakaran sa baratong kusog-pamuo.

Wala na nila direktang gilimud ang makatarunganong sukaranan sa hangyo alang sa dugang nga suholan. Wala na katupngi sa bisan unsang pagmaniho sa istatistiks o pagsalapid sa anindut nga mga larawan ang dayag nga kahimtang sa makaylapong kalisdanan. Naghugyaw ang panginahanglan ug pagkamakatarunganon nga mapun-an ang suholan sa mga mamumuo.

Sa ilahang propaganda, gihulagway nila nga ang pagdugang sa suhol sa mga mamumuo, mauy makadaut sa ekonomiya sa nasud tungud kay mulamsad kini sa pagpanira o pagkaalkansi sa mga kumpanya ug pagpugong sa pagsulud sa bag-ong langyaw'ng pamuhunan. Labaw sa tanan, kini mauy suliran sa mga dagkong langyaw'ng kapitalista ug mga kakunsabo nila. Apan tinguha nilang ihulagway nga kini, sa sangputanan, mauy suliran sa mga mamumuo. Gigamit nila ang mga bakak, hiwi ug direktang maka-imperyalistang argumento aron atakihun ang baruganan ug pakigbisog sa mga mamumuo ug katawhan alang sa dugang nga suholan.

Gipaningkamutang ihulagway sa rehimeng Macapagal-Arroyo ug sa mga propagandista sa dakong kapital nga ang pagduso sa dugang nga P125 sa inadlaw-adlaw'ng suhol sa mga mamumuo, mauy usa ka baruganan nga dili riyalistiko ug kontra-kasadpan. Gihikyad nila ang mga "alternatibo" sa tinguhang ipakita nga aduna pay "labaw'ng pleksibleng" opsyon, nahagawas sa paghatag og dugang nga suhol nga makaabag sa mga mamumuo nga harungon ang nagsulabing krisis.

Ingonman, unsamang dayandayan nga "alternatibo", mauy dili makatubag sa panginahanglan alang sa dugang nga suhol. Ang baruganan alang sa dugang nga suholan, bisan kanus-a man, mauy dili

makankan sa malinlangon niining mga "alternatibo".

Ang hisgutanang sa ubus nga suholan ug sa hangyo alang sa dugang nga suhol, mauy sentral nga hisgutanang alang sa mga mamumuong Pilipino. Ang patakaran sa baratong kusog-pamuo nga gipahamtang sa imperyalismong US ug gipasiugda sa reaksyunaryong estado, mauy usa sa mga haligi sa pagpahimulos sa kasamtangang semikolonyal ug semipyudal nga sistemang katilingbanon. Ang pag-ininut sa suholan sa mga mamumuong Pilipino, mao ang nag-unang



...ang labaw'ng daghang kaso sa pagpanangtang sa trabaho, mauy wala gidulut sa pagdugang og suholan. Sa tugbang, gidulut kini sa walay pugung-pugong nga pagpatuman sa "pleksibilisasyon" sa pamuo nga gipahamtang sa mga dagkong kapitalistang langyaw ug lokal.

pamaagi sa pagpangulipon sa mga mamumuong Pilipino.

Kinahanglan nga militanteng ipakigbatok sa mga mamumuo ang dugang nga suhol aron mapugngan ang padayon nga pagdaus-os sa ilahang panginabuhian. Kinahanglang ibutyag ang kahaw-ang ug kabakakan sa tanang argumento kontra sa dugang nga suhol. Kinahanglang itin-aw ug pakaylapon ang kahustuhan ug pagkamakatarunganon sa panglantaw ug baruganan sa mga mamumuo ug sa maong sukaranan usab, maagni ang makaylapong suporta sa katawhang Pilipino.

ANG TINUUD NGA TINUBDAN SA NAGKADAKONG DISEMPLEYO

Usa lamang ka haw-ang nga pagpanghadlok sa mga mamumuo ang katarungan nga ang pagdugang sa suholan, mauy muresulta sa makaylapong pagpanira sa mga empresa ug pagpanangtang sa trabaho sa mga mamumuo. Gihimong rason sa mga dagkong kapitalista ang piit nga kahimtang sa mga gagmay'ng negosyo aron kasap-ungan ang kamatuuran nga ang mga dagkong kapitalista, mao ang adunay labaw'ng dakong kasal-anan sa makaylapong tinangtangay sa mga mamumuo. Gisap-ungan usab niini ang tinuud nga tinubdan sa kalisdanan sa mga gagmay'ng negosyo—

Nag-unang mga hinungdan sa permanenteng pagpanira/retrenchment ug gidaghanon sa apektadong mga mamumuo (Enero-Mayo 2001)

Hinungdan	Kinatibuk-ang ihap	Nanirang empresa	Nagtangtang og mga mamumuo	Apektadong mamumuo
Total	1083	218	870	26,911
Reorganisasyon/ <i>redundancy</i>	498	8	493	7,084
Paghugno sa demand	222	67	156	8,626
Pagkaalkansi	146	65	81	3,188
Kakulangon sa kapital	53	24	30	2,311
Taas nga gastos sa produksyon	41	10	31	2,364

Tinubdan: Bureau of Labor and Employment Statistics

ang patakarang liberalisasyon nga mauy nagsilbi sa interes sa mga dagkong kapitalista. Gibitad sa niining argumento ang pagtagad sa kamatuuran nga naghingapin ang katakus sa mga dagkong kapitalista nga ihatag ang P125 nga dugang sa inadlaw-adlaw'ng suhol kung ikunsidera ang produktibidad sa mga mamumuo sa maong mga dagkong empresa.

Nag-una sa tanan, hataga'g pagtagad nato ang mga hinungdan sa makaylapong tinangtangay sa mga mamumuo niini lamang. Lantawon nato ang usa ka surbey sa Bureau of Labor and Employment Statistics (BLES) sa Department of Labor and Employment (DOLE) nga gigama niining Hunyo 2001. Langgikit dinhi ang 1,083 ka empresa nga nagtaho nga nanira o nanangtang sa mga mamumuo niining Enero-Mayo 2001 nga nagresulta sa pagdisempleyo sa 26,901 ka mamumuo. Gipiho sa 80% niining mga empresaha nga ang ilahang pagpanira o pagpanangtang og mga mamumuo mauy dulut nag-una sa mga musunud: *reorganization/downsizing/redundancy* o pagreorganisa/pagpanangtang og mga tawo/pagtibhang sa mga naghinubrang tawo (46%), kawad-un sa merkado o mamalitay (20.5%) ug pagkaalkansing pangpinansya (13.5%). Mao kini ang aktwal nga nahimong hinungdan sa pagpanangtang sa 21,521 ka mamumuo o 80% sa pangkinatibuk-ang nawad-an og trabaho sa niining panahuna. Migula usab sa niini nga surbey nga hapitan 80% sa mga mamumuong gipangtang o nawad-an og trabaho, mauy naggikan sa dagko ug relatibong mga dagkong empresa nga nagpa-empleyo og 100 o

labaw pang mga mamumuo.

Sa pikas bahin, labaw lamang sa 2% sa mga empresang nagtaho ang nagbungat nga ang pagpataas sa suhol, mao ang nahimong hinungdan sa ilahang pagpanira o pagpanangtang sa mga mamumuo.

Sa laktud, ang labaw'ng daghang kaso sa pagpanangtang sa trabaho, mauy wala gidulut sa pagdugang og suholan. Sa tugbang, gidulut kini sa walay pugung-pugong nga pagpatuman sa “pleksibilisasyon” sa pamuo nga gipahamtang sa mga dagkong kapitalistang langyaw ug lokal. Hisgutanang kini usâ pa man misibaw ang kasamtangang hisgutanang sa mabulukong pagdugang sa suholan sa mga mamumuo. Niadto pa man, nahasulud na sa krisis ang industriya sa Pilipinas. Ubay-ubay na usab nga mga katuigan nga nagkagamay ang nanulud nga direktang langyaw'ng pamuhunan samtang kuyanap usab ang pagpanira ug tinangtangay sa mga mamumuo sa mga dagkong kumpanya.

Padayon nga nagkasamut ang ingon niining kahimtang taliwala sa pag-aginud sa produksyon sa mga niaging bulan. Gidulut kini sa problema sa subrang produksyon sa pangkalibutang sistemang kapitalista nga misangput karon sa pagpiut sa pangkalibutang merkado alang sa nag-unang eksport sa nasud, sama sa mga pyesang elektroniks, mga pamisti ug lana sa lubi. Tungud niini, niining unang tunga sa tuig ang eksport sa mga pyesang elektronik, mihugno og 29.27%; mga pamisti, 9.1%; ug lana sa lubi, 26.9%. Ang eksport sa mga pyesang elektronik, mauy naglangkub sa

labaw'ng katunga hangtud sa 75% sa pangkinatibuk-ang eksport sa nasud. Sa pangkinatibuk-an, nagpakita og paghilig nga pagkunhod ang nagamit nga kapasidad sa produksyon sa nasud gikan 79.8% niadtong 1999 ug 80.1% niadtong 2000, ngadto sa 77.8% niadtong unang kwarter sa 2001 ug 76.3% niining Mayo.

Ang gitagamtam nga krisis sa sektor sa industriya, mauy gisakluban sa padayon ug labaw'ng dako pang suliran sa "globalisasyon" o sa labaw ug hapitan nga kumpleto nang pagbukas sa ekonomiya sa Pilipinas ug uban pang semikolonya aron larga-tudung makapangawat ang mga langyaw'ng monopolyo kapitalista. Sa paghandus sa "globalisasyon", gipatuman sa dagkong kapitalista ang hilabihang kadagmalang dagway sa pagbungkag sa mga pwersa sa produksyon sa nasud. Lakip niini ang patakaran sa ubus nga pagpanuhol; nagkalain-laing pamaagi sa "pleksibilisasyon" sa pamuo sama sa kontraktwalisasyon, kaswalisasyon, *downsizing* ug lain pang pamaagi sa pagpanangtang sa ihap sa mga mamumuo; pagtam-ak og mga subrang produkto sa mga imperyalista; pagtapun-tapon sa mga nasud

kundiin labaw'ng barato ang kusog-pamuo ug labaw'ng daghang insentibo alang sa langyaw'ng pamuhunan; ug uban pa.

KULANG PA SA IGO, DILI SUBRA, ANG GIHANGYONG P125 NGA DUGANG NGA SUHOL

Mini nga pakigbati ngadto sa mga mamumuo ang gisalida sa mga dagkong kapitalista ug mga tigpamâbâ nila sa pagbungat nga ang pagpataas sa suholan, mauy maglamsad lamang sa makaylapong pagpanira sa mga kumpanya ug pagpanangtang sa trabaho. Labaw sa bisan unsapaman, mao kini'y pakigbati sa kaugalingon sa mga dagkong kapitalista tungod kay dili sila makauyon nga makunhuran og bisan dyutay ang ilahang gihakup nga ganansya aron madugangan ang suholan sa mga mamumuo.

Hataga'g pagtagad usab nato karon ang hisgutanan sa balor sa gihangyo nga dugang nga suhol. Kung tugkaron, ang pagdugang og P125 sa kasamtangang P250 nga minimum nga inadlaw-adlaw'ng suhol, mauy dili pa makapaigo aron pun-an ang P510 matag adlaw nga kinahanglan alang sa mga pundamental

Inadlaw-adlaw'ng minimum nga suhol matag rehiyon ug kasagarang makabuhi nga suhol (family living wage o FLW) sa usa ka pamilyang adunay unom ka tawo (Mayo 2001)

Rehiyon	Huling nagtaas og suhol	Minimum nga suhol	FLW (Mayo 2001)
NCR	Nobyembre 2000	250	502
CAR	Mayo 1 2001	185	490
Rehiyon I	Disyembre 15 2000	190	459
Rehiyon 2	Nobyembre 1 2000	180	428
Rehiyon 3	Nobyembre 16 2000	208.50	446
Rehiyon 4	Oktyubre 19 2000	217	473
Rehiyon 5	Nobyembre 1 2000	182	438
Rehiyon 6	Nobyembre 16 2000	170	378
Rehiyon 7	Enero 1 2001	185	454
Rehiyon 8	Mayo 1 2001	177	332
Rehiyon 9	Disyembre 1 2000	165	440
Rehiyon 10	Mayo 1 2001	180	401
Rehiyon 11	Mayo 1 2001	180	385
Rehiyon 12	Nobyembre 16 2000	160	424
CARAGA	Mayo 1 2001	173	-
ARMM	Nobyembre 19 2000	140	636



Tinubdan: Bureau of Labor and Employment Statistics

nga panginahanglan sa usa ka yanong pamilya nga adunay unom ka tawo. Ingon pa man, labaw kining mabulukon itandi sa pinudyut nga umentong gihatag sa reaksyunaryong gubyrno sa mga nangaging tuig. Ang dugang nga P125 sa inadlaw-adlaw'ng suhol, mamahimo nang mabulukong

Ang mga empresang gagmay ug nagkalisud-lisud, mauy daan nang gihatagan og eksempsyon sa hingpit nga pagpatuman sa minimum nga suholan.



kasulbaran sa hilabihang pagkalisud-lisud ug pag-antus sa mga mamumuo ug, sa ingon, mupugong sa paspas nga pagsamut sa ilahang kahimutangan sa kinabuhi. Makapalagsik usab kini sa dugang pang mga pakigbisog sa mga mamumuo alang sa kapuslanan nila ug sa katawhan. Ang pagbalibad sa paghatag sa dugang nga suhol, mauy timaan sa kahakugan sa mga dagkong kapitalista.

Gihingusog sa pipila ka asosasyon sa mga dagkong negosyo nga lapaw na sa ilahang katakus ang maghatag og dugang nga P125. Apan gipanghimakak kini sa mga istatistiks.

Gipiho sa usa ka pagtuon sa Ibon Foundation Inc., sa pipila ka sektor sa manupaktura, nga ang yanong mamumuo nga nagdawatan og suhol nga P290, mauy nakamugna og bili nga P1,214 matag adlaw alang sa kapitalista. Buut pasabut, gikan sa pamuo sa matag mamumuo, nakasakgaw ang kapitalista og netong kita nga P924 matag adlaw. Sa ingon, ihatag man ang gipahangyo nga P125 matag adlaw nga dugang nga suhol, sulabi pa sa gihapon ang netong kitang P799 nga ibulsa sa kapitalista. Labaw pa kaayo niini ang gimugnang bili sa mga mamumuo sa dagkong mga empresa nga hataas ang ang-ang sa produksyon ug produktibidad sa mga mamumuo. Nagdawatan man karon og lapas sa minimum ang mga mamumuo sa dagkong mga empresa, adunay katarungan pa sa gihapon nga mangayo sila og dugang nga P125 sa ilahang mga suhol.

Gipakita usab sa datos gikan sa Philippine Industry Yearbook of Labor Statistics nga ang gastos sa mga

midyum ug dagkong mga empresa sa suholan sa mga mamumuo, labaw lamang og dyutay sa 10% sa ilahang kinatibuk-ang gastos sa produksyon. Sa laktud, bisan itaas pa sa 50% ang suholan, dili mulapas sa 5% ang madugang sa gastos sa mga kapitalista sa produksyon. Usa kini ka gamay kaayong kantidad nga sarang kaayong kapun-an sa ilahang ganansya, ilabina sa mga dagkong kapitalista.

Ang mga empresang gagmay ug nagkalisud-lisud, mauy daan nang gihatagan og eksempsyon sa hingpit nga pagpatuman sa minimum nga suholan. Giabaga nila ang responsibilidad sa paghangyo niini. Sa pikas bahin, daan na usab nga gipakita sa kalihukang mamumuo ang kaandaman niining mahimong pleksible ug maghatag og lugway sa pakigharong sa gagmay nga mga negosyante. Naggikan ang maong patakaran sa kalihukang mamumuo sa pag-ila sa kamatuuran nga ang gagmay'ng mga negosyante, mauy mitagamtam sa krisis, nag-una, dulut sa pagpamig-ut sa mga langyaw'ng monopolyo kapitalista, mga dagkong kapitalistang kumprador ug burukrata ug mga dagkong agalong yutaan. Ang gagmay'ng mga negosyante, mauy labaw karong gipanggun-ub sa larga-tudung liberalisasyon sa pamatigayon ug pamuhunan, nga naghandus pataas sa ilahang mga gastos sa produksyon ug nagwahing kanila sa merkado.

Angay nga ang gagmay ug hatungang mga kapitalista, mauy danihon sa kalihukang mamumuo nga batukan ang dominasyon sa mga dagkong kapitalistang lokal ug langyaw.

DUGANG NGA SUHOLAN BATOK SA PAGTAAS SA PRESYO

Dili angay ikahadlok sa mga mamumuo ang panganti sa mga dagkong kapitalista ug reaksyunaryong gubyrno nga ang pagpataas sa suholan sa mga mamumuo, mauy maglamsad lamang sa pagpataas sa presyo sa mga palaliton. Kini ang hulga nga angay'ng atubangon sa mga mamumuo pinaagi sa dugang pang kaisug ug kaandamang makigbatok.

Nagdumili ang mga kapitalista nga kunhuran og bisan diyut lamang ang ilahang naghingapin nga naganansya. Kung mapilitan man silang muhatag og dugang nga suhol, manimalus sila ngadto sa mga mamumuo pinaagi sa pagpataas sa presyo sa mga

palaliton.

Sa kahimtang nga naghulga ang dugang pagtaas sa mga presyo, responsibilidad sa gubyerno nga pugngan ang pagtaas sa presyo pinaagi sa nagkalain-lain mekanismo, pagmonitor sa pagpamresyo sa mga negosyante, mekanismo alang sa pagkontrol sa presyo, pagsuporta ug subsidyo alang sa mga pundamental nga mga igbabaligya.

Taliwala sa pagkamapasagaron niini sa gubyerno, obligadong atubangon usab sa mga mamumuo ang pagbatok sa pagpataas sa mga presyo pinaagi sa subli na usab nga pakigbatok alang sa pagpataas sa suholan.

Duyug sa pakigbisog alang sa dugang nga suholan, kinahanglang pakusgon usab sa masang mamumuo ug katawhan ang ilahang kaandaman nga batukan ang walay pugong nga pagpataas sa presyo ug kawalay pagtagad sa gubyerno sa katungdanan niining pugngan kini. Kinahanglan nga adunay panaghiusa tali sa mga mamumuo ug uban pang katawhang kabus aron ihandus ang pagpakunhud sa presyo sa mga kasagarang palaliton.

ANG PAGDANI SA LANGYAW'NG PAMUHUNAN

Gihingusog sa mga reaksyunaryo nga ang pagpataas sa suholan sa mga mamumuo, mauy makababag sa paglambo sa ekonomiya tungod kay pugngan niini ang pagsulud sa bag-ong langyaw'ng pamuhunan.

Ang ingon niining argumento, mauy nagpasiugda sa neokolonyal nga patakaran sa baratong kusog-pamuo o pagbugsuk sa suholan sa mga mamumuo sa ubus nga ang-ang aron makadani og langyaw'ng pamuhunan. Hibat ang konsepto sa “paglambo” sa ekonomiya, nga nakasukad sa pagdani sa langyaw'ng pamuhunan ug hingpit nga pagbukas sa ekonomiya sa ilahang pagpangawat. Hingpit usab niining giwahing ang makasaysayanong kamatuuran nga ang paglambo sa ekonomiya, mauy labaw'ng angay pa uganing tan-awon nga pagpalambo sa nasudnong industriya,

kundiin ang gihataga'g duso ug prayoridad, mauy mga lokal nga paktor ug dili ang pagsulud sa langyaw'ng puhunan.

Gawas nga kini, direktang anti-mamumuo, gisalip-ungan niini ang tinuud ug labaw'ng pundamental nga mga paktor luyo sa nagpadayon ug labaw pang nagkasamut nga krisis sa ekonomiya.

Ang krisis sa ekonomiya sa Pilipinas, mauy permanenteng nagtunhay dulut sa kawalay nasudnong industriyalisasyon ug tiunay nga reporma sa yuta. Gimudmud sa imperyalismo ang Pilipinas sa atrasadong kahimtang aron musilbi kining yanong tigsuplay og baratong hilaw'ng materyales ug baratong kusog-pamuo alang sa tipik nga pagproseso ug tigpalit og mga human na daang produkto sa mga imperyalista.

Gipamatud-an sa pipila ka dekadang neokolonyal nga paghari sa imperyalismo sa nasud, nga walay gidulut nga pag-usbaw o kalambuan ngadto sa pamuhunan sa nasud ang langyaw'ng dagkong kapitalista. Inay, dugang pagpanglupig, pagpahimulos ug pagpaantus ang gidulut niini sa nasudnong ekonomiya ug sa katawhan.

Labaw'ng gigupuk sa pagpasiugda sa imperyalistang “globalisasyon” ang atrasado na



Ang pagbibigay ng naaangkop na sahod sa masang manggagawa at pag-aangat ng kabuhayan ng masang magsasaka sa pamamagitan ng reporma sa lupa ay mangangahulugan ng paglaki ng konsumo sa mga saligang pangangailangan at ng pamilihan para sa pagbwelo ng produksyon ng mga lokal na industriya at agrikultura.

uganing ekonomiya sa nasud. Gibungkag niini ang unsapamang nabiling haligi sa ekonomikanhong kaugalingnan. Bisan ang pinakagamay nga aspeto sa nasudnong patrimonya, mauy gisubasta na usab sa mga langyaw. Gisakripisyo ang interes sa katawhan, lakip ang hangyo sa mga mamumuo alang sa dugang nga suholan, diha sa altar sa “globalisasyon”.

Sa niaging mga katuigan, labaw'ng misamut ang krisis sa pinansya ug ekonomiya dulut sa walay pugong nga pagbukas sa ekonomiya nga gipabuylo ubus sa programang Philippines 2000 o ang Medium Term

Philippine Development Plan (MTPDP) nahasubay sa patakaran sa liberalisasyon nga gisugdang ipatuman ni Ramos niadtong 1992 nga gipadayon ni Estrada niadtong 1998 ug gipadayon karon ni Macapagal-Arroyo.

Ubos niining programaha, gipadagan ang

Giplastada sa rehimen ang nagkadaiyang dayandayang “alternatibo” aron kasap-ungan ang paghikaw, sa esensya, sa pagpatuman sa mabulukong dugang sa suholan sa mga mamumuo.



pinakamaut nga dagway sa pagpahimulos ug pagpanaug-daug sa hut-ong sa mamumuong Pilipino. Lakip niini ang *labor-only contracting*, kaswalisasyon, *downsizing/streamlining*, pagsumpo sa katungud sa pagtukud og unyon ug pagwelga. Kining tanan, nakapunting sa pagbabag sa pagpataas sa suholan sa mga mamumuo ug sa pagpatanud sa mga mamumuo aron maagni sa nasud ang mga langyaw'ng mamuhunan.

Ang panginahanglan aron sulbaron ang krisis sa ekonomiya sa Pilipinas, mao ang pagpatuman sa nasudnong industriyalisasyon ug tiunay'ng reporma sa yuta. Sa ingon lamang malangkubon nga mapalambo ang ekonomiya. Ang paghatag og haum nga suholan sa masang mamumuo ug pag-isa sa panginabuhian sa masang mag-uuma pinaagi sa reporma sa yuta, magkahulugan sa pagdako sa pagkonsumo sa mga pundamental nga mga panginahanglan ug sa merkado alang sa pagbuylo sa produksyon sa mga lokal nga industriya ug agrikultura. Sa ingon, mutunhay ang sukaranan sa pag-abanti sa nasudnong industriyalisasyon. Sa pikas bahin, ang patakaran sa baratong kusog-pamuo, mauy nahaayon ug nagpabilin sa atrasado ug di industriyalisadong kahimutangan sa ekonomiya. Sukwahi kini sa gibungat sa mga reaksyunaryo nga ang pagdugang sa suholan sa mga mamumuo, mauy babag sa industriyalisasyon.

ANG MGA REGIONAL WAGE BOARD

Aron labaw'ng mapahugno ang suholan sa mga mamumuo, gibungkag sa reaksyunaryong gubyrno

ang nasudnong minimum nga suhol ug gihimong lokalizado ang pagtakda niini pinaagi sa Wage Rationalization Act of 1990 o Republic Act 6727. Kining balaura, mao ang nagtukud sa mga Regional Wage Board. Katuyuan niining siak-siakon ang han-ay ug bulag-bulagon ang pakigbatok sa mga mamumuo.

Epektibong nagamit ang mga Regional Wage Board aron bugsukon sa ubos kaayong ang-ang ang suholan sa mga mamumuo luyo sa paspas nga pagdaus-os sa panginabuhian. Sukad niadtong 1997, dili na mulapas sa P67 matag adlaw ang gitakdang dugang sa suhol sa usa ka mamumuo samtang miabut na sa labaw P300 ang dugang nga gikinahanglan pa niyang apsun aron makab-ut ang mga panginahanglan alang sa disenteng ikabuhi sa iyahang pamilya.

Gisuportahan sa dilawan (dalagán) nga mga lider sa kalihukang pamuo ang pagpanglinla sa mga Regional Wage Board pinaagi sa tinuig nga pagpasaka sa niining mga pagpaigua og ilahang mga petisyon alang sa dugang nga suhol ug pagpahayag og dakong pasalamat sa unsamang tinagidyut nga gihatag niining mga talaytaya.

Busa, buyon sa pakigbisog alang sa dugang nga suholan, kinahanglang ipakigbatok usab sa mga mamumuo ang pagbasura sa RA 6727 ug pagbungkag sa mga Regional Wage Board. Kinahanglang kahiusahan sa entero kalihukang pamuo ang kasamtangang pakigbatok alang sa lehislasyon sa nasudnon ug pangkinatibuk-ang dugang nga P125 sa inadlaw-adlaw'ng suhol.

ANG MGA DAYANDAYANG “ALTERNATIBO” SA DUGANG NGA SUHOL

Giplastada sa rehimen ang nagkadaiyang dayandayang “alternatibo” aron kasap-ungan ang paghikaw, sa esensya, sa pagpatuman sa mabulukong dugang sa suholan sa mga mamumuo. Sa iyahang diskurso niadtong Hulyo 23, gipangayo ni Gloria Macapagal-Arroyo sa mga kapitalista ang paghatag sa Emergency Cost of Living Allowance (ECOLA) ngadto sa mga mamumuo; ug gitugyan ang posibilidad nga mudawat ang mga mamumuo og uban pang “benepisyo” lakip ang pagpakunhud sa gibayarang buhis, mga programang pabalay ug uban pa. Kahiusa ni Macapagal-Arroyo ang mga repormista ug pipila ka

dalagán nga lider sa pagharong sa ingon niining mga “alternatibo”.

Ang ingon niining mga sugyut, mauy direktang pagpanglinla sa mga mamumuo sa tinguhang pahilumon sila ug isimang ang ilahang pakigbisog alang sa dugang nga suholan. Gitingub kini isip mga lakang nga mudulot og hinanaling pag-alibyo sa mga mamumuo o mga “safety net” sa pinulungan sa mga dilawan ug repormista. Apan sa sangputanan, abagahunon usab sa mga mamumuo ang mga negatibong epektong idulut sa niining mga “alternatibuha”.

Sa panawagan ni Macapagal-Arroyo alang sa paghatag og ECOLA, gipaniguro niya sa mga negosyante nga kini, mauy ilhon nga pagpuno lamang ug ibalik sa mga mamumuo kung pananglit aduna silay makab-ut nga dugang suhol. Gawas pa niini, pamalihug lamang kini ni Macapagal-Arroyo, busa wala kini’y birtud o gibug-aton sa balaud.

Usa pa ka “alternatibo” nga dugay nang gisugyut sa mga repormista ug dilawan nga lider ug gisuportahan karon ni Macapagal-Arroyo, mao ang pagtangtang o pagpakunhud sa *withholding tax* (buhis nga otomatikong gitibhang sa suholan sa mga mamumuo). Dako kini nga pagpanglinla. Una sa tanan, wala man usay gitibhang nga ingon niini sa suholan sa mga mikita lamang og minimum nga suhol.

Gawas pa, ang matibhang sa gikulektang buhis sa gubyerno, mauy bakwiun lamang usab pinaagi sa pagdugang sa mga dili direktang buhis nga gipahamtang ngadto sa katawhan, pagdaginot sa mga pinakapundamental nga serbisyong pangpubliko nga kinahanglan sa katawhan, ilabina sa masang anak-sa-buhat, sama sa mga serbisyong panglawas, edukasyon, pabalay ug uban pa, ug direktang pagpas-an sa katawhan sa nagakadakong gastos niini.

Niining miaging mga bulan, mitaas og 20%

ang pagpaningil sa serbisyo sa mga pangpublikong hospital. Niining miaging pagbukas sa eskwelahan, misaka ang matrikula sa mga pangpublikong kolehiyo nga nagsugud sa 5% hangtud 15%. Patas-an na usab ang pagpaningil sa mga serbisyo sama sa tubig ug kuryente. Ug adunay planong patas-an usab gikan 8% ngadto sa 21% ang kontribusyong gibayaran sa mga membro sa SSS.

Niini pa lamang, aduna nay migula nga memorandum gikan sa International Monetary Fund nga naghandus sa pagpasaka sa *value-added tax* nga gikan 10% hangtud 11%; ug sa *excise tax* (buhis sa pangonsumo) sa sigarilyo, *beer* ug alak (imnunong makahubog).

Ang gipasikarang gambalay sa mga argumento ug pamaagi sa kapitalista ug sa rehimen sa pagbalibad nga ipatuman ang mabulukong dugang sa suholan sa mga mamumuo, mauy neokolonyal nga patakaran sa baratong pamuo. Duyug sa pakigbisog alang sa makatarunganong suhol alang sa mga mamumuo ug pakigbatok sa mga pagbalibad, laraw, pagpanglinla ug propaganda sa mga dagkong kapitalista ug sa rehimen, kinahanglan usab nga batukan ang mismong gipasikaran niining gambalaya sa malupigon ug mapahimuslanong sistemang katilingbanon.

Ang pakigbisog sa hut-ong mamumuo alang sa dugang nga suhol, mauy kabahin sa pakigbisog sa katawhang Pilipino batok sa kasamtangang nagtunhay nga madaugdaugong sistemang katilingbanon. Ang kadaugan sa masang mamumuo sa niini nga pakigbisog, mauy kadaugan usab sa tibuok katawhan. Sa ingon, angay’ng ipasundayag sa tanang pwersang demokratiko ug patriyotiko ang suporta sa pakigbisog alang sa dugang nga suhol ug ihatag ang tanang mamahimong itampo ngadto sa pagpaasdang ug ikapadaug niining maong pakigbisug.